



**Naalakkersuisunut**  
Uunga/

29. juni 2006

**Inatsisartut Suleriaasianni § 36, imm. 1 naapertorlugu Naalakkersuisunut apeqqut imaattoq matumuuna saqqummiuppara:**

**Tunngavilersuut :**

Inatsisartut Inuussutissarsiornermut Ataatsimiititaliaat aamma Aalisarnermut, Piniarnermut Nunalerinermullu Ataatsimiititaliaat 2006-imi ulluni aprilip 6-ianniit 10-at ilanngullugu Sisimiunut Maniitsumullu paasisassarsiorlutik angalapput.

Sumiiffinni inuussutissarsiornep ineriartornera nammineerluni takunninnikkut annertunerusumik paasisaqarfigineqarnissaa Ataatsimiititaliat angalaneranni siunertarineqarpoq. Tamatuma saniatigut najukkani inuussutissarsiortunit immersorneqarnissaq paasisutissinneqarnissarlu ataatsimiititalianit kissaatigineqarpoq, taamaalillutik ataatsimiititaliat ullumikkut Kalaallit Nunaanni inuussutissarsiornep ilisarnaatitut unammilligassai periarfissaalu namminneq isiminnik takullugit paasisaqarfigisinnaaniassagamikkit.

Ataatsimiititaliat angalaneranut tapiliussatut kommunini aqutsisut, inuussutissarsiornermut siunnersuisoqatigiit, aalisarnermut, piniarnermut inuussutissarsiornermullu soqutigisaqatigiiffiit ataatsimiititalianit ataatsimeeqatigineqarput. Tassunga atatillugu aalisarnermik inuussutissarsiortunut aamma nunamiit aallaaveqartumik inuussutissarsiortunut suliffeqarfinnut arlalinnut ataatsimiititaliat takuniaapput. Suliffeqarfiit angisuut mikisullu, namminersortunit pisortaniillu pigineqartut ataatsimiititaliat takuniaaffigaat.

Ataatsimiititaliani ilaasortanut paasisaqarfiusumik suliat assigiinngitsorpassuit saqqummiussuunneqarmata ataatsimiititalianut annertuumik pissarsiffiupput.

**Apeqqut siulleq:**

Inuussutissarsiutinik ingerlatsisut unammilleqatigiinnissaat peqqinnartuusoq uanga nammineerlunnga isumaqarpunga. Tamanna suliaqarfinni assigiinngitsuni iliuuseqarnissamut nutaaliornissamullu pissutaaqataasarpoq. Nunatta angissusia eqqarsaatigalugu Namminersornerullutik Oqartussat suliffeqarfiutaat angisoorujussuupput, taakkulu inuussutissarsiornikkut suliniarnerminni suliffeqarfinnut allanut avaqqunneqarsinnaanngitsumik unammillersutut inissittariaqartassallutik.

Suliniutit sullivinnit namminersortunit iluatsittumik aallartinneqarsimasut assiginginik Namminersornerullutik Oqartussat suliffeqarfiutaat aallartitsisarsimasut ataatsimiititaliat angalaneranni qulaa ni taaneqartumi ataatsimiititalianut assersuutigalugu qaluttuarineqarpoq. Namminersornerullutik Oqartussat suliniutinik atorunnaarsitsisarsimasut suliniutillu taakku assinginik sulliviit namminersortut iluatsittumik aallartitsigaangata kingusinnerusukkut aallartitseqqittarsimasut oqaluttuarineqarpoq. Namminersornerullutik Oqartussat sulliviutaat pisuni taamaattuni sullivinnut namminersortutut aallarterlaanut sakkortuumik unammillertunngorajuttut oqaluttuarineqarpoq.

Tamanna Kalaallit Nunaata inuiaqatigiittut imminut isumagisutut ingerlalnissaanik sulinermut, sulliviit Namminersornerullutik Oqartussanit pigineqartut taamaalillutik namminersortut suliniutaannut akiuppata naapertuuttuussanngitsoq isumaqarpunga. Sulliviit Namminersornerullutik Oqartussanit pigineqartut aningaasat Namminersornerullutik Oqartussat pigisaat atorlugit namminersortut annikitsunik aallarnisaasut unammillerlugit peersippatigit inuussutissarsiutit namminersortunngorsarneqarnissaat sumut iluaqutaassagami.

Tamanna tunngavigalugu nunatsinni niuernerme sulliviit Namminersornerullutik Oqartussanit pigineqartut unammillernermet qanoq politikeqarnerat pillugu Naalakkersuisut politikeqarnerat tusagaqarfigerusuppara.

### **Apeqqutip aappaa:**

Apeqqummut siullermut tapullugu sulliviit Namminersornerullutik Oqartussanit pigineqartut akornanni unammilleqatigiinnermut piumasaqaatit atuuttut sunniutaasa – iluarsanneqarsinnaaneri siunertaralugu – erseqqinnerusumik misissuataarneqarnissaat pisariaqartoq ataatsimiititalianit paasineqartoq oqaatigissavara. Arctic Greenfoodip Royal Greenlandillu akornanni isumaqatigiissummi piumasaqaatinik sinerissami sumiiffinni assigiinngitsuni suliniutitigit ineriartortitsinissamik Arctic Greenfoodip kissaataanut akornusiisuusutut pissusilimmik peqartoq oqaatigineqarpoq. Piffissami inuussutissarsiornikkut ineriartortitsinissamik pisariaqartitsileruttorfimmi suliniutinik inuiaqatigiinnut ataatsimut iluaqusiisuusinnaasunik aallartitsinissamut piumasaqaatit taamaattut akornusiisuusariaqanngitsut isumaqarpunga. Isumaqarpunga pissutsit ullumikkut allanngorsimasut, taamaalillunilu Arctic Greenfoodip suliniutai niuernikkut atugassarititaasunik nalinginnaasunik tunngaveqartinneqartariaqartut. Tamakku erseqqinnerusumik naliliivigineqarnissaannut piffissan-ngorsimasoq isumaqarpunga. Namminersornerullutik Oqartussat suliffeqarfiutaasa akornanni isumaqatigiissutit ullumikkumut naleqqutinnngitsut unammillernissamillu killiliisuusut taamaattut, Naalakkersuisut Namminersornerullutik Oqartussat sinniisaattut, iluarsiniarlugit siunertaqarnersut paaserusuppara.

### **Apeqqutit pingajuat:**

Angallatinik tunioraavinnik atugaqarnissamut akuersissuteqartarnermik isumaginninnerup arriippallaamik pisarnera aalisarnermik ingerlatsisut ilaat isornartorsiorlugu saqqummiussipput. Piffissap aalisarfiussap piareersarneqarnissaa soorunami piffissaqarfigineqartariaqartoq aalisartut oqaatigaat. Akuersissutigineqartut taamatut kingusitsigisukkut tunniunneqartarnerat akuersarneqarsinnaanngilluinnartoq isumaqarput. Piffissaq aalisarfiussaq aallartitsinnagu akuersissutit tunniunneqarlutillu piffissaalluarallartillugu nalunaarutigineqartassasut kissaatigineqarpoq. Isumaqarpunga taamatut piumasaqarneq pissusissamisoortuusoq. Angallatinik tunioraavinnik atugassiinnermut akuersissutinik tunniussisarnermut aalajangersimasumik periuseqartoqarnersoq Naalakkersuisunut akeqqussavara, pissutsillu taamaattut ingerlaannarnissaat pingitsoortinniarlugu Naalakkersuisut qanoq iliuuseqarniarnersut.

Inussiarnersumik inuulluaqqusillunga

Ruth Heilmann  
Inatsisartuni ilaasortaq  
Siumut